



A.nr.608/2026

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Eshref Shabani-kryetar, Ardita Haxhnikaj-Demi dhe Malësore Gashi-Bajraktari, anëtare, me Ilire Mehmeti-Shaqiri, në cilësinë e procesmbajtëses, ka shqyrtuar ankesën A.nr.608/2026 të datës 08.06.2026, të parashtruar nga ankuesi B.B, kundër organit të punësimit Sekretariati i Këshillit Gjyqësor të Kosovës, në çështjen juridike “*kompensim material*”, duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, i ndryshuar dhe plotësuar me Ligjin Nr.08/L-180 si dhe në mbështetje me dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datë 28.07.2026, mori këtë:

V E N D I M

Hedhet poshtë si e parakohshme ankesa numër A.nr.608/2026, e datës 08.06.2026, e parashtruar nga ankuesi B.B.

A r s y e t i m

Nëpunësi civil B.B (*tutje referuar vetëm ankuesi*), më datë 08.06.2026, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, lidhur me kompensimin retroaktiv të diferencës së pagës sipas koeficientit të miratuar.

Këshilli i Pavarur Mbikëqyrës për Shërbimin Civil të Kosovës (*tutje Këshilli*) bazuar në dispozitat e Rregullores Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, me datë 15.06.2026 ka procedurë kërkesën për përgjigje në ankesë tek Sekretariati i Këshillit Gjyqësor të Kosovës, ndërsa kjo e fundit me datë 14.07.2026 ka dërguar përgjigje në ankesë së bashku me provat referuar çështjes në procedurë ankimore.

Kolegji për Shqyrtimin dhe Vendosjen e Ankesave, për shqyrtimin e kësaj lënde ka administruar këto prova: Ankesën me numër protokolli 2593/2026 të parashtruar nga ankuesi në Këshillin e Pavarur Mbikëqyrës për Shërbim Civil të Kosovës; Kërkesën me numër 03/1013 të datës 15.05.2026 të parashtruar nga ankuesi te organi i punësimit; Aktin e emërimit me numër 03/154 të datës 05.02.2025; Dokumentin e identifikimit të ankuesit; Kërkesën për përgjigje në ankesë të datës 15.06.2026;

Përgjigjen në ankesë të datës 13.07.2026; Përshkrimin e detyrave të punës për pozitën Administrator i Lartë i databazave; Listën e pagave për muajin 01.03.2026- 31.03.2026; Emalin e datës 17.07.2026; Vendimin me numër 887 të datës 19.09.2024;

Kolegji i Këshillit pas shqyrtimit dhe analizimit të shkresave të lëndës të parashtruara nga palët në procedurë, ka gjetur se ankesa e ankuesit është e parakohshme, **sepse**:

Nga administrimi i provave të lëndës, Kolegji i Këshillit, ka gjetur se ankuesi është punësuar në Sekretariatin e Këshillit Gjyqësor të Kosovës, dhe se i njëjti sipas akt emërimit me numër 03/154 mbante pozitën Administrator i Lartë i Data bazave me koeficient 12, ndërsa pagën sipas koeficientit të cekur në aktin e emërimit e gëzon nga muaji mars i vitit 2026.

Ankuesi me datë 15.05.2026 ka parashtruar kërkesë te organi i punësimit gjegjësisht në Departamentin e Administratës së Përgjithshme, në zyrën e Personelit në Sekretariatin e Këshillit Gjyqësor, me pretendim që të kompensohet diferenca e pagës së koeficientit të miratuar, nga data 05.02.2025 deri me datë 28.02.2026, pa marr përgjigjen nga organi i punësimit ankuesi me datë 08.06.2026 parashtron ankesën me numër protokolli 2593/2026 në Këshillin e Pavarur Mbikëqyrës për Shërbim Civil të Kosovës me pretendimet e njëjta.

Kolegji i Këshillit lidhur me pranueshmërinë e ankesës së ankueses, ju referua dispozitave të Ligjit Nr.05/L-031 për Procedurën e Përgjithshme Administrative, gjegjësisht nenin 98 paragrafin 1 dhe 2, ku përcaktohet se: *1. Procedura administrative nisur sipas kërkesës, do të përfundojë sa më shpejt që të jetë e mundur, por jo më vonë se sa afati i përcaktuar me ligj të veçantë për atë lloj procedure. 2. Në rast se ligji i veçantë nuk ka paraparë një afat, siç është paraparë në paragrafin 1 të këtij neni, afati i përgjithshëm i zbatueshëm për përfundimin e procedurës administrative është dyzetepesë (45) ditë nga fillimi i saj, si dhe nenit 127 paragrafi 1 dhe 4 i të njëjtët ligj ku përcaktohet se: “1. Ankesa duhet të parashtrohet brenda tridhjetë (30) ditëve nga data kur pala është njoftuar për aktin administrativ. 4. Ankesa kundrejt heshtjes administrative mund të parashtrohet jo më herët se shtatë (7) ditë dhe jo më vonë se dy (2) muaj pas skadimit të afatit për njoftimin e aktit administrativ...”* e në kuptim të këtyre dispozitave ligjore si dhe duke u bazuar në shkresat e lëndës, Kolegji konstaton se ankesa e ankuesit e parashtruar në Këshill më datë 08.06.2026 është e para afatshme, pasi që ankuesit ende pa kaluar afati ligjor për përfundimin e procedurës administrative të iniciuar sipas kërkesës së datës 15.05.2026 dhe rrjedhimisht ende pa u përmbushur kriteri kohor lidhur me heshtjen administrative parashtron ankesë në Këshillin e Pavarur Mbikëqyrës për Shërbimin Civil të Kosovës. Andaj, mbi këtë bazë konstatimi, Kolegji vlerëson se ankesa e ankuesit është pa pranueshme në kuptim të nenit 129 paragrafi 1 nën paragrafi 1.3 të Nr.05/L-031 për Procedurën e Përgjithshme Administrative.

Në kontekst të mbrojtjes së të drejtave nga marrëdhënia e punës, Kolegji thekson faktin se hedhja poshtë e ankesës A.nr.608/2026, nuk nënkupton mohimin e së drejtës së ankuesit që i njëjti serish të parashtroj kërkesë me bazë të njëjtë pranë organit të punësimit, e në rast të heshtjes se serishme administrative të këtij të fundit të ushtroj ankesë në Këshillin e Pavarur Mbikëqyrës për Shërbimin Civil të Kosovës brenda afateve ligjore për heshtje dhe çdo herë duke respektuar afatet e parashkrimit të kërkesave të natyrës materiale sipas ligjit në fuqi të punës.

Kështu që, pas analizimit dhe vlerësimit të të gjitha shkresave të lëndës si dhe duke u bazuar në nenin 18 paragrafi 1 nën paragrafi 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi dispozitivit të këtij vendimi.

Vendimi hyn në fuqi ditën e nënshkrimit nga Kryetari i Kolegjit.

Këshillë juridike: Kundër vendimit të Këshillit, pala e pakënaqur mund të iniciojë konflikt administrativ në Gjykatën Administrative në Prishtinë- Departamenti për Konteste të Punës, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
LËNDA, A.nr.608/2026

Ilire Mehmeti-Shaqiri

Procesmbajtëse

Eshref Shabani

Kryetar i Kolegjit

Vendimi i dërgohet:

- Ankuesit B.B;
- Udhëheqësit të Njesisë së Burimeve Njerëzore në Sekretariatit e Këshillit Gjyqësor;
- Arkivit të KPMSHCK-së.